



ATASSUT

UPA 2016/ 51

Steen Lyngé

19. 04. 2016.

Illumik pisinermut atatillugu illup qanoq innera pillugu naliliinermik sanasoqartalernissaanut inatsisitigut piunasaqaateqartalernissamut atatillugu aningaasatigut iluaqutissanik ajoqutaasunillu misissuisoqarnissaa pillugu kiisalu illumik pisinermut atatillugu illut nukimmik atuisarnerat pillugu nalunaaqutsiisarnissap inatsisitigut piunasaqaataalernissaanut atatillugu misissuisoqarnissaanut Naalakkersuisut peqquneqarnissaannik Inatsisartut aalajangiiffigisassaattut siunnersuut. Aamma misissuinermi ilanngullugu paasiniaqquneqarpoq sillimmasiisarfiit piginnittut nikinneranni suleqataanissaminnut piunasaqaatigisinnaasaat kissaataallu. Misissuinerup inerpera Inatsisartunut agguaanneqassaaq 2017-imi ulloq 1. januaari tikitsinnagu.

(Inatsisartunut ilaasortaq Justus Hansen, Demokraatit)

Siunnersuummi matumani siunertarineqartoq Atassummiit paasilluarsinnaavarput.

Illut pitsaassusaat nalilersuiffigisagaanni misissugassat suunersut innuttaasut tamatigut ilisimaqqissaarnek ajorpaat. Kikkut tamarmik periarfissaqanngillat inissiamik illumilluunniit pisisussanngornerminni akorngutit imaaliillaannaq takuneqarsinnaanngitsut arajutsinaveersaagassatik suunersut ilisimassallugit, assersuutigalugu isugutammut tunngasut.

Taamaattumik ullutsinni inigisassaminnik pisisussat ilarpassui sanasumik ilinniarsimasumik imaluunniit ilisimasalinnik allanik peqateqarlutik arlaannik arajutsinaveersaagaqartariaqarnerlutik misissuiniartarput. Qaqutigoortuunngilaq illumik tunisaqarniartut sinniisorisartagaasa, tassa inissianik illumilluunniit tuniniaasartut. illumik tuniniarneqartumik pisisussat pisiariniagaartik alakkarterilerunikku ilimasalimmik peqarnissaannik kajumissaaruteqartarnerat.

Taamaalilluni arajutsinaveersaartariaqarnermut tunngatillugu akisussaaffik pisisussap tamakkiisumik ullumikkut nammappaa. Siunnersuummilu matumani siunertarineqarpiartoq tassaavoq akisussaaffik taanna siunissami tuniniaasumiilissasoq, soorlu siunnersuuteqarnermut tunngavilersuutigineqartumi taama allassimasoqartoq.

Illut takoriaannangitsumik akornguteqarsinnaanerannut tuniniaasut pisisussallu naligiimmik sillimmartaarutigisinnaasaannik illumik piginnittut nikinnerini sillimmasiisoqartarnissaa ullutsinni piunasaqaatigineqanngilaq. Taamaatut sillimmasiisoqartalernissaa periarfissaalersinneqassappat illut niuerutigineqartussat qanoq isussusaat pillugit nalunaarusiortoqartalernissaa piunasaqaataasussaavoq.

Siunissami illumik niueruteqarnermi illut qanoq issusaat pillugu nalunaarusiortoqartalernissaa piunasaqaatigineqalissappat, taava piginnittut nikinnerannut atatillugu sillimmasiisoqartalernissaa aamma alloriarfigineqartariaqalersussaavoq. Taamattummik illut niuerutigineqartussat qanoq issusaat pillugit nalunaarusiortoqartalernissaannik aalajangertoqassappat alloriarneq tamakkiisoq tiguneqartariaqassaaq, tassalu piginnittut nikinnerannut atatillugu sillimmasiisoqartalernissaa

ilanngullugu periarfissiissutigineqartariaqarpoq – imaluunniit ilanngullugu piunasaqaatinngortittariaqarpoq.

Tamanna illup qanoq issussaa pillugu nalunaarusiap suliarineqarneranut atatillugu aningaasartuutaasalersussat qaavatigut tuniniaasut pisisussallu peqatigiillutik akilertalerumaagassaat 10 aamma 45.000 kronit missaanniittussaavoq. Tamanna tunisinermi akigitinneqartunut qanoq sunniuteqassava? Soorunami aningaasartuutaalersussat taakku illup akianut ilassutigitinneqartussaasalerumaarput, aamma nunatsinni sumiiffinni tamani illup qanoq issussaa pillugu nalunaarusiortoqarsinnaasassava? Taamaassanngippat taava sumiinneq apeqqutaatillugu assigiinngisitaartunik maleruagassaliortoqassava?

Tassa tamakkuupput siunnersuutip matuma imarisaata ilanngullugit sunniuteqarfigilersinnaasai.

Atassummiit tunngaviusumik isumaqarpugut suliat suulluunniit ilisimasanik toqqammaveqarluni suliarineqartariaqartut, taamaattumik illut qanoq issusaat pillugit nalunaarusiortoqartalernissaanik siunnersuummut atatillugu inaarutaasumik isumminnginnitsinni misissuisoqarnissaa qilanaaraarput.

Qujanaq!